

Agama-agama di Dunia

Dalam suatu syarahan yang diberikan oleh *al-Ustādh* Ahmad Sonhadji Mohamad di Masjid Sultan Singapura pada malam 27.8.1963 di majlis membahagi-bahagikan hadiah peraduan bacaan al-Qur'an al-Karīm bagi penuntut-penuntut agama seluruh sekolah di Singapura anjuran 4 P.M. beliau telah menerangkan tentang kelahiran agama di dunia dalam majlis tersebut sebagai perbandingan kepada agama Islam. Memandang kepada kandungan syarahan tersebut kami anggap penting maka kami sajikan di sini sebahagiannya bagi tatapan para pembaca Qalam yang budiman.

Hindu.

Ialah nama kumpulan agama-agama dan tanggapan-tanggapan dunia di India yang mengandungi pengakuan terhadap 4 perkara:

1. Pengakuan terhadap kitab "Veda" sebagai

wahyu mutlak.

2. Kepercayaan akan "Darma."

3. Pengakuan para "Brahman."

4. Penerimaan sistem "Kasta."

Orang-orang Hindu mempercayai kesatuan "tiga tuhan" yang menjadi satu 1. Brahman (pencipta)

2. Vishnu (pemelihara). 3. Shiva (peminasa).

Menurut kepercayaan mereka bahawa "Manu" ialah yang menurunkan segala manusia. Dialah yang bersifat lebih kuat dari langit, lebih besar dari bumi, lebih tinggi dari segala bintang bahkan lebih tinggi dari segala sesuatu. Membuat apa yang dikehendakinya, menjadikan segala yang terlintas di hatinya, dialah zat alam yang satu ini seluruhnya, bukan lelaki dan bukan perempuan, dialah roh yang tidak terjelma sifatnya pada

sesuatu, bahkan dialah yang meliputi segala sesuatu, tersembunyi di dalam segala sesuatu, tak dapat dicekai oleh pancaindera kerana... dianya itu merupakan hakikat atau kenyataan....dan dia itulah Brahma.

Dari "Manu" melahirkan 4 kasta:

1. Dari kepalanya menjadi pendeta Brahma.

2. Dari lengannya menjadi raja dan panglima perang

3. Dari pahanya menjadilah pekerja, petani dan

saudagar untuk mendermakan hasil mereka kepada pendeta Brahma, raja-raja dan panglima-panglima.

4. Dari tapak kakinya menjadilah kasta manusia

yang terendah, yang mana mereka itu diciptakan hanya untuk memperhambakan diri kepada 3 golongan lainnya yang disebutkan di atas.

Tiap-tiap manusia yang mati rohnya keluar untuk memasuki jasad seorang bayi yang dilahirkan seketika itu juga. Yang mulia hanya akan lahir pada bayi yang berdarjat mulia, sedang yang jahat akan lahir pada bayi yang berkasta rendah. Kepercayaan ini merupakan "kepercayaan penjelmaan". Dan mereka memuja segala

roh yang dijadikan pula tuhan yang berbilang-bilang banyaknya. Kerana roh itu terdapat pada batu-batu pohon-pohon kayu, binatang-binatang, sungai-sungai, gunung-gunung, bintang-bintang... seterusnya ular-ular itupun dianggap sebagai tuhan yang mesti dimuliakan.

Penyembahan terhadap kepada lembu adalah menjadi cara penyembahan yang umum dilakukan oleh orang-orang Hindu. Tak boleh binatang itu dimakan dagingnya dan tak boleh menggunakan kulitnya, bahkan jika mati hendaklah dikebumikan dengan upacara kehormatan agama.

Dari bermacam-macam corak ini jelaslah hakikat keimanan orang-orang Hindu... mereka mempunyai tuhan dari segala jenis...semuanya. Mereka pandang mempunyai kuasa yang maha besar yang dapat menguasai alam ini.

* * *

Buddha.

Buddha itu ialah nama seorang pendeta, asalnya anak seorang raja di India lahir kira-kira pada tahun 579 sebelum lahirnya Nabī 'Isā, namanya "Siddharta" Gautama" di perdataran sungai Gangga.

Dia telah ditilikkan oleh tukang-tukang tenung semasa ibunya bermimpi sebelum mengandungkannya, dia bakal menjadi raja yang akan menguasai seluruh negeri bila tinggal di istana, tetapi akan menjadi seorang pendeta besar bila mengasingkan diri menjadi musafir kelana berkeliling negeri yang akhirnya menjadi Buddha ertinya orang yang "bercahaya".

Semenjak kecilnya Siddharta Gautama ini terasuh

dalam serba kemewahan dalam istana ayahnya. Diajar pelbagai ilmu keperwiraan di samping mempelajari agama Hindu berpandukan dengan kitab suci mereka yang bernama Veda.

Semenjak kecilnya lagi dia telah mempunyai sifat penyayang terhadap semua makhluk dan tidak suka menyakiti segala makhluk yang bernyawa.

Dia telah kahwin semenjak umurnya 16 tahun dengan seorang puteri yang cantik yang sebaya dengannya kerana sama hari lahirnya. Hidup berumah tangga yang berbahagia selama 10 tahun dan mendapat seorang anak lelaki, tetapi di hari lahir anaknya itu dia telah meninggalkan istana untuk mencari ketenangan jiwa – bosan dengan hidup serba mewah sedang beribu-ribu manusia yang lain dalam sengsara. Keinginannya ialah hendak mempertinggi tingkatan kerohaniannya dengan mempelajari hidup dari masyarakat yang ditemuinya. Kadang-kadang ditemuinya orang tua yang telah bongkok dan kurus dimakan penderitaan hidup. Berjumpa dengan pengemis sedang sakit yang terlantar di tepi jalan, dan berjumpa serombongan orang yang sedang mengusung mayat. Tiap-tiap yang dilihatnya dinyatakannya dan mendapatkan jawapan-jawapan yang merupakan hakikat hidup dan pelajaran-pelajaran yang amat berguna baginya.

Sesungguhnya Siddharta Gautama lebih banyak belajar dari hidup berbanding dengan pelajaran agama dari kitab suci orang Hindu yang bernama Veda.

Dia pernah bertapa, pernah berlapar, pernah menyiksa diri, tidur di atas, paku, memecahkan kaca dan

– Sambungan ke muka 29



Puan “Elizabeth M” sedang mendengar dengan rasa khusyuk dan tawaduk kata nasihat yang berharga dari Tuan Syeikh al-Azhar Tuan Mahmud Shaltut sejeurus selepas mengiklankan Islamnya di hadapan beliau dan menukar namanya dengan nama “Fatimah Khurshid”.

Sambungan dari muka 10

lain-lainnya kerana dengan cara menyiksa diri itu sahajalah nafsu manusia dapat dibersihkan... demikianlah mengikut pelajaran Brahma.

Dengan menyeksakan diri ini jadi kuruslah badannya hampir tidak berdaya lagi untuk hidup, akhirnya dia terbuka dan makan. Setelah dia makan dirasanya tubuhnya menjadi segar dan fikirannya pula menjadi terang dan dapat berfikir dengan lebih sempurna. Oleh itu ditinggalkannya segala amalan menyiksa diri itu dan memilih “jalan pertengahan” – tidak bermewah-mewah dan tidak menyiksa diri.

Dia telah dianggap kecewa untuk mendapatkan kebahagiaan hidup oleh 5 orang Brahma yang bersama-sama mengembara dengannya dan pernah pula menjadi gurunya.

Tetapi pada suatu ketika setelah 7 tahun mereka berpisah dan bertemu semula mereka telah berbalik

mengikuti pengajaran-pengajaran Siddharta Gautama yang telah bergelar “Buddha” itu.

Buddha mengatakan: Ada dua jalan yang perlu dijauhi.

1. Hidup mewah, kerana dia merupakan hidup keaku-keakuan yang hina. 2. Hidup menyiksa diri yang tak patut dilakukan orang yang mahu hidup.

Tinggalkanlah keduanya kerana tidak dapat menyampaikan kepada hidup yang baik.

Buddah mengajarkan 8 wasiat: 1. Percaya kepada kebenaran.

2. Bertindak yang benar. 3. Bercakap yang benar. 4. Berlaku yang benar. 5. Berbuat yang benar. 6. Berusaha yang benar. 7. Merenungkan yang benar. 8. Memusatkan yang benar dan ini tak dapat dilakukan melainkan dengan mengikuti peraturan yang 7 itu.

Pernah ia memberikan 5 wasiat kepada seorang perempuan yang kematian anak dengan pesanan: 1. Jangan

membunuh segala yang hidup. 2. Jangan mencuri atau mengambil yang tidak diberikan orang. 3. Jangan sekali-kali berdusta. 4. Jangan berdiri di atas kekejian. 5. Jangan menjadikan diri mabuk pada sebarang masa.

Pengajaran Buddha ini telah dijadikan orang panduan hidup yang bertukar menjadi agama. Tetapi setelah Buddha mati dalam usia 80 tahun. Pengikut-pengikutnya telah terbagi dua. Satu pihak “mempertuhkannya” dan yang satu pihak masih menganggapnya sebagai “seorang pendeta” atau wali yang dimuliakan.

Pengajaran Buddha melarang menyembah berhala dan segala sesuatu, melarang mempersembahkan korban-korban kepada berhala. Tetapi setelah matinya pengikut-pengikutnya telah menganggapnya pula dia sebagai tuhan dan mempersembahkan di hadapan patungnya beraneka macam persembahan sebagai korban.

Pengikut-pengikutnya yang telah mempertuhkannya itu tak dapat bertahan di India, kebanyakannya telah merantau-rantau ke timur dan selatan India yang meliputi negeri Burma, Siam, Ceylon, Nepal, negeri China, Jepun hingga Kepulauan Melayu terutama di Jawa dan di Bali. Tetapi agama Buddha itu telah beragam-ragam dan bermacam-macam pula coraknya.

Ada juga pengikut Buddha yang tidak mempertuhkannya hanya menganggapnya sebagai seorang pendeta yang suci, tetapi bilangannya sangat sedikit di selatan India. Bahkan penduduk India telah berbalik semula menganut agama Hindu sebagai agama rasmi kebanyakan para pemerintahnya.

* * *

Janti¹.

Janti ialah nama suatu agama yang dianut oleh orang-orang India sebagaimana orang-orang India menganut agama Buddha. Diwujudkan agama Janti ini hampir bersamaan dengan wujudnya agama Buddha. Kalau agama Buddha itu berasal dari Siddharta Gautama yang kemudian digelar Buddha, maka Janti berasal dari seorang anak raja yang bernama “Mahavira”.

Biografi anak raja ini pun hampir sama dengan biografi Buddha. Dan ia meningkat sebagai pendeta yang mencari kesucian jiwa dengan cara mengembara dan belajar dari memperhatikan keadaan alam.

Pengikut-pengikutnya pernah mengatakan bahawa agama atau pengajaran yang dibawa olehnya adalah “agama yang azali” yang tak berpermulaan dan tak berkesudahan yang telah hidup semenjak bermilion-milion tahun. Kerana pengajarannya bukan manusia saja boleh faham bahkan semua makhluk yang bergerak memahaminya – sejak dari burung, tanaman-tanaman pokok-pokok kayu pun memahaminya. Kerana mengajarkan suatu akidah bahawa tiap-tiap sesuatu itu mempunyai roh, dialah nikmat yang sebesar-besarnya di muka bumi, maka tidaklah boleh membunuh mereka untuk mencari kelazatan diri.

Mengikut agama Janti; dilarang bertanam, kerana bertanam itu mengoyak bumi dan membunuh cacing.

Tak boleh minum madu, kerana madu itu makanan lebah.

Tak boleh memasak air, kerana ditakuti boleh membunuh binatang-binatang yang di dalamnya.

¹ Merujuk kepada Jainism.

Tak boleh menebang pokok atau membakar sesuatu supaya tidak terbakar lalat atau nyamuk.

Hendaklah menutup mulut dan hidung yang menahan waktu bernafas supaya tidak terikut binatang-binatang halus masuk hidung lalu mati.

Jangan makan daging binatang atau menyembelihnya atau mengorbankannya.

Jika seseorang ingin menjadi seorang Janti yang sejati hendaklah menjadi pengasuh dan pembela binatang yang telah tua atau sedang sakit.

Pengajaran Janti juga mempunyai wasiat atau rukun sebanyak tujuh perkara di antaranya ialah:

Berjanji untuk berakhlak yang baik, menjauhkan berakhlak yang buruk, berlaku warak tidak mengganggu atau menyakiti, sedikit bergerak, sedikit bercakap, dan sedikit berfikir yang mengenai perkara-perkara keduniaan, hendaklah mengasihi diri dengan sifat-sifat yang mulia seperti pemaaf, benar, lurus, tawaduk, bersih, pelihara diri, menjauhi kelazatan dan kemewahan dan menjauhi perempuan dan lain-lainnya.

Sekali pandang kepercayaan mereka sesungguhnya merupakan kepercayaan yang sangat ganjil, tetapi bagi mereka itulah yang menjadi pegangan hidup berdasarkan, kasih sayang, belas kasihan dan pembersihan jiwa.

Confucius

Mengikut kepercayaan orang-orang Cina, bahawa sebelum alam ini wujud, tak ada sesuatu yang wujud. Akhirnya setelah beberapa lama, wujudlah satu makhluk yang mereka gelarkan dengan nama "P'an Ku".

Mengikut kepercayaan mereka "P'an Ku" itu sesuatu makhluk yang berkepala naga, berbadan ular, dapat menjelma berbagai-bagai rupa yang ada dalam alam ini semenjak 2,229,000 tahun sebelum Nabī 'Isā dan telah hidup selama 18,000 tahun.

Ketika dia mati, berkumpullah nafasnya menjadi angin dan awan, suara rintihannya menjadi petir dan guruh, darahnya menjadi anak sungai, peluhnya menjadi hujan, tulangnya menjadi batu, giginya menjadi benda-benda galian, bulunya menjadi hutan dan tumbuh-tumbuhan, dagingnya menjadi tanah, kepalanya menjadi gunung, mata kirinya menjadi matahari, dan mata kanannya menjadi bulan, sedang kutu-kutu yang di tubuhnya menjadi manusia. Demikianlah hakikat kejadian alam mengikut kepercayaan orang-orang Cina.

Kemudian datanglah orang-orang kayangan memerintah di muka bumi selama seratus tahun menciptakan manusia yang asalnya dari kutu-kutu naga itu diajar dari manusia yang liar menjadi manusia yang bertamadun.

Ada pun orang kayangan yang mula-mula mengajar manusia kira-kira pada tahun 2838 sebelum Nabī 'Isā bernama "Fu Xi". Orang kayangan Fu Xi ini mempunyai seorang adik perempuan bermuka manusia dan berbadan

ular bernama “Nu Kau Xi¹” dialah yang menyelamatkan alam ini.

Orang-orang Cina pada masa itu umumnya memuja kekuatan alam – seperti lain-lain bangsa pada masa itu – terutama tentang pemujaan nenek moyang. Arwah kaum keluarga mereka yang sudah mati dianggap turut menerima bahagian dari sajian-sajian atau korban-korban yang mereka persembahkan. Peranan penting yang dipegang oleh ahli kubur dalam kehidupan anak cucu itulah tanda utama dari agama serta kebudayaan orang-orang Cina. Roh-roh yang mereka puja mereka anggap mempunyai daya dan kuasa yang dapat memberi bahagia dan dapat pula memberi celaka.

Di antara tuhan yang mereka sembah itu bernama “Shang Ti”, tuhan yang maha adil dan tuhan dari segala roh yang menguasai alam. Namun ada lagi tuhan yang paling tinggi darjatnya daripadanya iaitu tuhan langit yang dinamakan “Tian”.

Dialah tuhan dari segala tuhan kerana dialah yang memerintah hujan, angin dan petir. Di samping itu mereka juga memuja matahari, bulan, angin, hujan, api, petir, gunung, sungai dan lain-lain lagi yang semuanya itu mereka anggap mempunyai roh-roh yang suci.

Kelahiran Confucius

Dia anak seorang panglima perang bernama “Shu-liang He” yang telah putus asa kerana mempunyai 9 orang anak semuanya perempuan, tak ada anak lelaki yang diharapkannya kelak boleh memuja rohnya selepas mati.

Setelah berumur 70 tahun dia kawin dengan seorang perempuan bernama “Zhengzai” yang kemudiannya mendapat anak lelaki diberi nama “Zhimu Kong²” dan dia inilah “Confucius”.

Setelah Confucius berumur 3 tahun bapanya mati dan dipelihara oleh ibunya yang hidup melarat. Namun ibu itu telah mendidik anaknya dengan sempurna dan berpelajaran cukup berkat rajin dan tekunnya di samping mempunyai kecerdikan yang luar biasa.

Waktu umurnya 19 tahun dikahwinkan, dan kerjanya menjadi penjaga gudang makanan.

Setelah mendapat anak kehidupannya semakin perit yang miskin ia berusaha lagi menambahkan ilmu pengetahuan dalam jurusan syair, muzik dan tarikh. Akhirnya dapat menjadi guru, dan rumahnya dijadikan sekolah tempat mengajar murid-muridnya. Murid-muridnya semakin banyak dan semakin lama namanya menjadi masyhur, maka pada ketika itulah dia diberi gelaran “Filsuf Kong” atau Kong Fu Zi yang akhirnya telah berubah menjadi Con-Fu-Cius.

Nama Confucius semakin bertambah naik bila berlaku suatu peristiwa yang menyedihkannya dengan kematian ibunya yang sangat dikasihinya. Dia merana, membawa hati yang duka, melupakan segala sesuatu yang ada di sekelilingnya, waktunya dihabiskan hanya untuk meratapi ibunya. Tiga tahun dia berkabung seperti itu.

Setelah habis masa berkabung, bangunlah ia kembali meneruskan tugasnya mengajar sehingga menjadi

¹ Perkataan sebenar ialah Nu Kua Hsi.

² Merujuk kepada Kongzi (nama sebenar Confucius).

mahaguru tempat mengambil ilmu yang didatangi oleh murid-muridnya yang semakin banyak. Ketika umurnya 34 tahun ditafsirkan muridnya berjumlah 3,000 orang, dan setelah berumur 50 tahun semakin banyak. Cara ia mengajar hampir serupa dengan cara filsuf Suqrāt¹ filsuf bangsa Greek yang termasyhur itu, iaitu mengajar dengan cara lisan, duduk di atas pentas yang dikelilingi oleh murid-muridnya.

Adalah diceritakan, seorang perempuan datang kepadanya dengan menangis sambil menceritakan tentang anak dan suaminya yang telah mati dimakan harimau. Bila ditanya mengapa mereka tinggal di tempat yang ada harimau? Dijawab oleh perempuan itu bahawa di tempatnya tidak ada hakim yang zalim. Maksudnya: Mereka tidak mendapati tempat tinggal yang diperintah oleh hakim yang adil kecuali tinggal dalam kawasan yang lebih aman walaupun bersama-sama dengan sekawan harimau.

Mendengar itu Confucius menyuruh murid-muridnya supaya menuliskan dalam pelajaran “bahawasanya hakim yang zalim itu lebih berbahaya dari harimau yang ganas”.

Di antara pengajaran-pengajarannya ialah mengasihi binatang. Dia tak pernah memakai baju sutera walhal banyak orang memakainya dengan alasan katanya “Saya tak suka membiarkan diri saya membunuh ulat untuk mendapatkan suternya yang kemudian saya jadikan pula baju.”

Juga dia tidak minum susu, kerana katanya “Susu itu adalah hak kepunyaan bayi, binatang dan ternak”.

Juga dia berbangga kerana tak pernah menangkap ikan atau memburu binatang. Bolehlah dikatakan keseluruhan pengajaran Confucius itu lebih dekat kepada akhlak, adab dan kesusilaan daripada pengajaran agama, kerana dia tidak pernah memperkatakan tentang tuhan atau langit, nirvana atau neraka sebagai yang terdapat pada agama Hindu, Buddha Janti dan lain-lainnya. Hanyalah pengajaran yang memberi tuntutan bagaimana seorang itu mesti berbuat baik.

Di antara kata-kata sakti yang diucapkannya berbunyi:

“Jika engkau mengetahui sesuatu, peganglah bahawa engkau mengetahui. Dan jika tak tahu, akuilah yang engkau tak tahu, kerana semua tadi pada hakikatnya adalah pengetahuan.”

Sudah terbit!

Pengajian

KESAH PELAYARAN

ABDULLAH MUNSHI

di-susun sa-mula oleh:

EDRUS

Harga \$2.50 sa-naskhah

tambah belanja pos (register) 40 sen

Di-chitak dan di-terbitkan oleh

QALAM

856/858, GEYLANG ROAD,

SINGAPORE 14.

¹ Merujuk kepada Socrates.